

PABOJA ETEHUE'YO CONOSA CUIÑAJJI YASIJJE COLOSENSES

**Pabohua Shomajo ejeanobia aniya esohui tehue canaje
Jesosaja epeeji cuana Conosa cuiñajjijo ba'e yasijje**

1 ¹Eya Pabo, Jesosa Quitoja huoojea'yo ojaya esohui huohuiya. Jamaya Eyacuiñajji sa poanaje. ²Timoteohua esejaya epeeji enijje esohui tehue cani miquiana huasijje jama ba'a: Ma Eyacuiñajjija epeeji cuana huasijjeme Conosa cuiñajjijo ba'e, ecuanaja epeeji e'e jojo nei Jesosa Quito nijje jjapee neineiuiyani yasijje. ¡Esejaya Chii aiya, Eyacuiñajjiya miquianaya cajaanahua cahua quea pame nee, quea bei capo mee cahua pea'ai!

Pabohua Eyacuiñajji bihuia cani

³Eyacuiñajji, esejaya Emeshi Mese nei Jesosa Quitoja Chii eyaya bihuia tiitiaña onijje miquianajo mimianijo. ⁴E'e, pea cuaa eya huohui cani jama ba'a: —Jesosaja epeeji cuaa Conosajo ba'ecaa Jesosa Quito shajja'ajja cani tii. Ojjaña Eyacuiñajjija epeeji cuana quea jea nee acani pea'ai.

⁵E'e, miquianaya esohui e'e jojo nei Jesosa Quitoja yahuajo pishana shajja'ajja coo majje onijje jjapeequinaje. Jjashahuabaquiani eba'e tiitii'yojji quea pame nee eyajo onijje pea'ai. E'e jojo nei Eyacuiñajjiya jamaya acaje'yo miquianajo. ⁶Jiquio esohui e'e jojo nei Jesosa Quitojo ojjaña meshi yasijje huohui cani. Jamajjeya quea huiso dejja ba'e mee cani quea pame nee, miquiana jayojjaya. Jamaya miquianaaya esohui shajja'ajja coo majje jjabahuejjaqui'yonaje. Jamajjeya jjabahuejja neineiui'yonaje ba'a: Eyacuiñajjiya dejja cuana jaahuana cani e'e jojo nei. ⁷Dejja Epapasi bajjani ecuanajaya quea jea nee. Ohuaya Jesosa Quitoja esohui huohui ca'yonaje miquiana que. Oya ecuaña jayojjaya Jesosa Quitoja yajjijo chacochoani. Ecuaña sohuihuohui sahuajji quea pame nee pea'ai. ⁸Ohuaya ecuaña huohui

canaje jama ba'a: —Edojjoshahua Pameya Jesosaja epeeji cuana Conosajo ba'e pea epeeji cuana quea jea nee po mee cani —Eapasija poanaje.

Pabo miminaje Eyacuiñajji nijje

⁹Eapasija esohui quea pame nee miqúanajo shajja'ajja'yo majje ecuana Eyacuiñajji nijje mimi huicha'huicha'ani jama ba'a: —Eyacuiñajji, jecuanajaya epeeji cuana ba neinei meesahuacue ache echacojji shai mijo onajaya poaje! Edojjoshahua Pameya oya cuana miquea esohui caba meesahua cahua quea pame nee, cjjashahuabaqui meesahua cahua quea ja'a nee epojji pea'ai. ¹⁰Jamajjeya jaya cuana Jesosa Quitoja esohui jayojja jama ba'e tiitii mee'yocue! Jamaya poanijo Jesosa Quito quea bihui nee nee poaje onajo. ¡Quea pame nee nee chaco tiitii meecue Jesosa Quitoja pea'ai! E'e Eyacuiñajji, ¡miquea epeeji mijo jjabahuejja tiitii meequicue pea'ai! ¹¹Miya ca ca oe quea ca'a nee nee, Eyacuiñajji. Jamajjeya ¡miquea epeeji cuana Conosajo ba'e jjapeequi meesahuacue quea ca'a nee nee! Jamajjeya oya cuana miquea esohui paje'yo ajja tii tii deja quea mase cuaa napa cajje, yeno'ama poaje. ¹²Eyacuiñajji, ecue Chii ai, oya cuana quea boejea'yo po mee'yonaje miyaya. Jamajjeya quijje oya cuana miquea pea epeeji cuana nijje ba'e tiitii meeje'yo quea ja'a nee minijje eyajo. E'e Eyacuiñajji, jamajjeya apoa. ¹³Yahuajo eseya Edosiquiaa napa ca'yonaje. Quea mase nee, quea mimishi nee nee. Jjeya ca ca esejaya Chii aiya eseya jjeshe ca'yonaje. Jamajjeya oja Bacua oe nei esejaya Emeshi Mese nei quea ca'a poaje'yo tii. Oja Bacua Jesosa Quito Eyacuiñajjija quea jea nee nee poani tii tii. ¹⁴Jama ba'a: Jesosa Quitohua esejaya mimishi cuana cuijea'yo majje Edosiquiana quea ca'a nee eseya mesena pajea mee ca'yonaje.

Jesosa Quito esejo mano'yonaje

¹⁵Dejja cuanaja Eyacuiñajji ecojja bajji pojjeama, jjacojjaba meequi ajja. Jamatii oja Bacua Jesosa Quito Eyacuiñajji jayojja nei neiya, o jayojjaya jama poani pea'ai. Jamajjeya Jesosa Quito ba majje Eyacuiñajji esejaya eba. Oya, Jesosa Quito ojjaña e'acquiana mese. Ojjaña acquiana cuana oja pana poa. ¹⁶E'e, Eyacuiñajjiya Jesosa Quito nijjeya ojjaña acquiana cuana pana ca'ya poa, jiquio acquiana ba'a: Ojjaña acquiana ojjaña meshi cuanajo pana ca'ya poa; ojjaña acquiana eyajo pana ca'ya poa pea'ai. Aquiana cuana ecojjaja ebajji, pea acquiana ecojjaja ebajji pojjeama pea'ai pana ca'ya poa jiquio ba'a: Eyacuiñajjija esohuidojojji quea ca'a nee pana ca'ya poa, eshahua cuana quea huiso, quea mimishi po jjimahuajo, pana ca'ya poa pea'ai. E'e, Eyacuiñajjiya Jesosa Quito nijjeya ojjaña acquiana, ojjaña tii pana ca'ya poa Jesosa Quitoja ya'yojji. ¹⁷E'e, oya Jesosa Quito ba'e tiitiiya poa ojjaña acquiana pana jjimahuajo. Ojjaña acquiana nequi tiitii mee cani quea pame nee, Jesosa Quitohua. ¹⁸Ojjaña ojaya epeeji cuanaja mese poani tii tii pea'ai. Ohuaya ma epeeji ojaya huapa pojjeama jayojja jama ojee jjapeequi meesahua cani, ojjaña. O

jayojja ba'e meesahua cani. Mano'yo majje Jesosa Quito ebionei shequi o'oyanaje. Jamajjeya oya oe nei quea ca'a nee nee poani tii tii. ¹⁹E'e, oja Bacua Jesosa Quito o jayojja poani tii tijjo, Eyacuiñajji quea bihui nee nee poani. ²⁰Yahuajo dejja cuana quea mimishijo Eyacuiñajjiya ojjaña aquiana cajaa aca'ya poa. Jesosa Quito acui ecueata'apeejo ba'e na cuayaqui'yonaje. Mano'yonaje. Jamajjeya Eyacuiñajjiya mimishi cuana cuijea caje'yo. Jamajjeya quea bei po o'oyanaje ojjaña oja pana cuana nijje eyajo, meshi cuanajo anica cuana nijje pea'ai.

²¹E'e, miqianaya yahuajo quea mimishi poanijo, quea jjashahuabaqui tai poanijo pea'ai Eyacuiñajji nijje jjapeequi ajja. Quea huesha nee poquiquehuani jayojja poanaje. ²²Jesosa dejja jayojja yamijji nequinaje. Jamajjeya Jesosa Quito esejaya mimishi cuanajo mano'yonajejo, Eyacuiñajjiya eseya ojaya epeeji cuana po mee ca'yonaje. Jamajjeya Jesosa Quitohua eseya Eyacuiñajji yasijje poqui mee caje'yo mimishi'ama, quea boejea epo'yo pea'ai. Jamajjeya Eyacuiñajji ese nijje quea bei poaje eyajo, ca ojaya esohui jama ba'e tiitiinajejo, Jesosa Quitoja esohuijo jjashahuaba tiitiinquinajejo pea'ai. ²³Jiquio esohui shajja'ajja majje ja'a pajea'yojji pea'ai! Quea huiso dejjaa quea huiso meshijo ba'eya jiquio esohui shajja'ajja cani eseyaya jayojjaya.

Jesosa Quitohua ca oe Pabo huoojea canaje esohui huohuiya

Jesosa Quitoja esohui ojjaña dejjaa shajja'ajja canaje ojjaña meshijo. Eya ca ca iña e'e jojo nei Eyacuiñajjiya esohui huohuijji; Jesosa Quitoja esohui huohuiaña. ²⁴Jesosa Quitoja esohui eya huohuiyajo, pea cuaa eya jeyo majje jeanobiajea canaje quea huiso cahuijo; quea nee. Jamatii eya quea bihui nee poani. Yahuajo Jesosa Quito quea nee nee poa. Jjeya eya quea nee pishana poani miqiana Jesusaja esohui jayojja ba'e meesahuajji. E'e pojja'a quijje Jesosa jayojja eya quea nee nee poaje. Dejja cuaa eya napa cajje eya quea ca'a poajo, Jesusaja epeeji cuana quea ca'a poaje pea'ai. ²⁵E'e jojo nei Eyacuiñajjiya eya huoojea ca'yonaje ojaya esohui huohuiya ojaya epeeji cuana huasijje. Jamaya miqianaya jjapeequi meesahuaña Jesosa Quito nijje. Ojjaña Jesusaja esohui huohuiaña pea'ai. Jiquio esohui eseya Eyacuiñajjiya ba meesahua cani. ²⁶Jiquio esohui dejja cuanaja quea quehua yahuajo nei poa. Ba mee jjima poa. Jjeya ca ca Eyacuiñajjiya ojaya epeeji nei cuana Jesosa Quitoja esohui ba meesahua cani quea ja'a nee. ²⁷Jamajjeya jjeya Eyacuiñajjiya ojjaña ojaya epeeji cuana, Jodio pojjeama cuana pea'ai ba mee sa acani ojaya esohui Jesosa Quitojo. Ma esohui quea pame nee nee jama ba'a: Jesosa Quito esejaya eyami dojjojo nequi tiitiyani. Jamajjeya eseya jjashahuabaqui onijje eyajo enequi tiitii'yojji. ²⁸Ojjaña Jesosa Quitoja esohui ecuaaya huohuiaña quea ja'a nee ojjaña huasijje. Ojjaña nei nei jjabahuejjaqui meeaña ojjaña Jesosa Quitoja epeeji quea ca'a nee epojji. E'e, jamaya poaje Jesosa Quito poe o'oyajo. ²⁹Miqianaya Quitoja epeeji quea ca'a nee epojji eyaya janobajjima nei esohui huohuiaña

Jesosa Quitoja. Jesosa Quito ecuea eyami dojjojo quea ca'a nee nequi. Ohuaya eya esohui ba neinei meesahua cani miquiana huasijje ehuohuijji.

2 ¹ ¡Bacue jiquio! Eya janobajjima nei jjashahuabaqui majje Eyacuiñajji nijje mimi neineiiani miquianajo Conosajo ba'e yasijje. Mimi neineiiani Jesosa Quitoja epeeji cuana Naonisea cuiñajjijo ba'e yasijje pea'ai, Jesosa Quitoja epeeji cuana ecuea ba jjima cuana huasijje pea'ai. Jamatii eya jjashahuabaquiani onajo pea'ai. ² Jamajjeya eyaya ojjaña miquianaya Jesosa Quitoja epeeji cuana quea ca'a nee po meesahuaje'yo. Miquianaya pea cuana nijje jjapeequi meesahuaje'yo e'e jojo nei pea'ai, esohui quea pame nee Jesosa Quitoja jjabahuejjaqui meesahuaje. Quea bei nee jjashajja'ajjaquije. E'e, jjeya ojjaña cuana esohui Jesosa Quitoja Eyacuiñajjiya ba meesahua caje'yo quea ja'a nee. Yahuajo ca maya ba mee jjima poa. ³ Jesosa Quitoja eba ojaye nei Eyacuiñajjija ejjashahuabaquijji, ojjaña tii. Onijje jjapeequianijo, Eyacuiñajjija ejjashahuabaqui'yojji quea ja'a nee ba meesahua cani Jesosa Quitohua. ⁴ ¡Ecuea esohui etehue'yo ba neineicue miquiaaya! Pea dejja cuana sijje poani Eyacuiñajjijo ¡a'a shajja'ajjajji! Dasia ca chana' mi. ⁵ E'e, eya ejeanobia ani. Jamajjeya miquiana nijje eya enequijji pojjeama. Jamatii eya jjashahuaba tiitiiquiani miquianajo, miquiana nijje nequi jayojjaya. Ecuea eba miquianaya Jesosa Quito nijje jjapee neineiquiani quea pame nee, ojaya esohui jayojja jama poani pea'ai. Jamajjeya eya quea bihui nee nee poani miquianajo.

Jesosaa eseya o jayojja ba'e meesahua caje'yo

⁶ Jamajjeya miquianaya Jesosa Quito nijje ebionei jjapeequi'yonajejo oya miquea Emeshi Mese nei quea pame nee poanaje. Jamajjeya ¡ba'ecue ojaya epeeji nei! ⁷ Jamajjeya ¡Jesosa Quitoja epeeji quea ca'a nee oe pocue! ¡Ojaya esohui ba tiitiihue! ¡Ojaya esohui e'e jojo neijo jjashahuaba tiitiiquicue pea'ai! E'e, jamaya pea dejjaa miquianaya huohui canaje. Eyacuiñajji nijje jamaya mimi tiitiihue: —E'e Eyacuiñajji, jamaya miquea esohui quea pame nee nee.

⁸ Dejja cuaa esohui e'e nei pojjeama huohui cani miquianaya. Quea quehua nee, etiiquiana cuanaja esohui. Jesosa Quitoja esohui jayojja jama pojjeama, quea ja'a nee pojjeama. ¡A'a shajja'ajjajji! Dasia caje'yo cuaa mi.

⁹ Jamajjeya ¡bacue jiquio! Oya Jesosa Quito eseya jayojja yamijji poa. Jamatii oya Eyacuiñajji nei poa. ¹⁰ Jesosa Quito nijje jjapeequianijo, Eyacuiñajjiya eseya ba'e tiitii mee caje'yo Jesosa Quito jayojja epo'yojji. E'e, Jesosa Quito Emeshi Mese nei oe nei quea ca'a nee nee. Ojjaña eshahua cuanaja mese, Eyacuiñajjija esohuidojojji cuanaja mese pea'ai quea ca'a pishana, de.

¹¹ Ojaya etiiquianaja esohui jama Jodio dejja cuaa cuiishasha jehuissejjajea cani. Jamaya huohui jjima acani Jesosa Quitohua. Onijje jjapeequianijo, ohuaya miquianajaya mimishi pajea mee ca'yani, miquianajaya ejjashahuabaqui'yojji

quea mimishi chama'yo po mee ca'yani. ¹²Jesosa Quito mano'yajo dejja cuaa ohuajea ca poa. Eyacuiñajjiya oya shequi mee ca o'oyanaje. Jesosa Quito ohuajea ca poa jayojja jamaya peaa miqianaya enajo besa mee canaje Eyacuiñajjiyo. Jamajjeya Eyacuiñajjiya Jesosa Quito shequi mee ca o'oyanaje jayojja jamaya ohuaya miqianaya ba'e meesahua caje'yo Jesosa Quito jama epo'yojji, ojaya esohuijo jshajja'ajjaquianijo. ¹³Yahuajo Jodio pojjeamaja Eyacuiñajjiya esohui miqianajaya ba jjiima. Quea mimishi nee nee poanijo miquea edojjoshahua cuaqui yasijje dobiqui'yo quiaye poanaje. Jjeya ca ca Eyacuiñajjiya miqianaya ba'e tiiti mee caje'yo Jesosa Quito nijje mimishi cuana ojjaña tii cuijea ca'yonajejo. ¹⁴Eseya aje oe Moisesija esohui etehuejo jshajja'ajjaqui ajjajo, Eyacuiñajjiya tehue mee canaje jama ba'a: "Ojjaña quea mimishi nee nee" poanaje. Jamatii jojaya Jesosa Quito esejaya mimishijo mano'yonaje acui ecueata'apeejo. Jamajjeya Eyacuiñajjiya e'e jojo nei esejaya mimishi cuana cuijea neinei ca'yonaje. ¹⁵E'e, Jesosa Quito acui ecueata'apeejo mano'yonaje. Jamajjeya eshahua cuana ca'a'ama po mee ca'ya poa, Eyacuiñajjiya. Jamaya ojjaña eshahua mese cuana jeabichajea ca'ya poa. Eyacuiñajjiya ojjaña ba mee canaje eyajo anica.

¡A'a esohui e'e nei pojjeama shajja'ajjajji!

¹⁶Jamajjeya ¡bacue oe! Pea cuaa miqianaya tecuea cani ojjaña bobi miquiaa ijjañaajo, pea e'ishijji ishiañaajo pea'ai. ¡A'a oya cuana shajja'ajjajji! Jodio cuanaja esohui jama ba'a: Ojee e'ijjiajji pojajajo, epojja chacocho mee ajja pea'a'ajo huohui cani; ¡a'a oya cuana shajja'ajjajji! ¹⁷Yahuajo ma esohui cuanajo dejja cuana jshahuaba meequi ca'yonaje ma Jesosa Quitohua quijje poe majje acañaje. ¡Jjeya nei Jesosa Quitojo jshahuabaquicue! Oya ca ca oe nei quea pame nee. ¹⁸Pea dejja cuaa jjacahuibaqui majje miqianaya Eyacuiñajjiya esohuidojojji bihuia mee sa acani bobima' ani tii. Ma dejja cuana ojaya ejjshahuabaquijji quea taijo mimi huicha'a huicha'ani. Jama sijje pome poani ba'a: —Ecuea ejjshahuabaquijji quea ja'a nee; onajaya quea ja'a pojjeama —poani.

Tecuea canijo ca oe ¡a'a jshajja'ajjaquijji! Eyacuiñajji nijje mi poqui pajea mee ca chana'. ¹⁹Ma dejja cuana aje oe Jesosa Quito nijje, esejaya Emeshi Mese nei nijje jjapeequi pajea'yonaje. Eseyaya Emeshi Mese neiya Jesosa Quitohua ojjaña ojaya epeejji cuana jjabahuejjaqui mee cani ojee. Jama ba'a: Jesosa Quito ojjaña ojaya epeejji cuana nijje ese ejja jayojja poani. Ojjaña ojaya epeejji cuana Jesosa Quitoja eyami jayojja poani. Esapa jayojja esejaya Emeshi Mese nei Jesosa Quito poani. Jiquio ecua esapaa eyami poqui mee cani jayojja jama Jesosa Quitohua ojjaña ojaya epeejji cuana huoojja cani, jjabahuejja meequi cani ojee ejjapeequijji. Jamaya Eyacuiñajjiya quea boti nee. Jamaya Eyacuiñajjiya ojjaña ojaya epeejji quea ca'a nee po mee sa acani. Eseyaya Emeshi Mese neiya Jesosa Quitohua ojjaña ojaya epeejji cuana ojee onijje jjabahuejja meequi cani; jamaya Eyacuiñajjiya ojjaña ojaya epeejji cuana quea ca'a nee po mee cani. Jamajjeya ojjaña ojee jjapeequi mee cani Jesosa nijje.

²⁰Miquianaya Jesosa Quito jayojja jama poanijo Jesosa Quitoja epeeji pojjeama cuanaja esohui quea quehua ¡a'a shajja'ajjaji! ¿Apiojji acuae jjeya maya esohui quea quehua shajja'ajja sa poani? Jesosa Quito nijje jjapeequianijo eshahuaja epeeji pojjeama poani. ²¹Esohui quea quehua jiquio jama ba'a: —Jiquio aquiana ¡a'a napajji! ¡A'a pea bobi cuana ijji! ¡Pea e'ishijji a'a ishijji! —jamaya dejja cuaa huohui nisho cani.

²²Jama pojjeama ca ca Eyacuiñajjiya esohui. Bobi cuana ijjiayeyo majje chama'yo tii poani. Joya miquiaa napaña aquiana chama'yo tii poaje pea'ai. ²³E'e, jiquio dejja cuaa pea cuana dasia cani; ojaya esohui quea quehua quea ja'a poso acani cuaa. Jamajjeya pea cuana jjashahuaba quehuaqui majje oe pojji bobi ijji jjima acani. Pea'ai Jesosaja esohui jama ba'e sa po'yo ajja. Cho, quea ja'a pojjeama ba'yani. Jamaya poanijo dejja cuana quea mimishi jjashahuabaqui pajea ajja.

Yahuajo quea tai ba'ya poa eba'ejji Jesosa Quito nijje quea pame

3 ¹Eyacuiñajjiya Jesosa Quito ba'e mee ca o'oyanaje. Jamajjeya ohuaya miquianaya ba'e mee caje'yo Jesosa Quito jayojja. Jamajjeya jjashahuaba tiitiqicue Jesosa Quitojo eyajo eba'ejji! Jama ba'a: Eyacuiñajjiya Jesosa Quito ojjaña huoojea'yojji quea ca'a nee nee po mee ca'yonaje. Oya Eyacuiñajjiya ebianeí mijije ani. ²E'e, jjashahuaba tiitiqicue oe Jesosa Quitojo! ¡Aquiana taijo oe a'a jjashahuabaquijji! ³Jama ba'a: Dejja emano'yojaa mimishi po'yo ajja. Jamaya miquianaya jjeya emano'yo jayojjaya mimishi po sa po'yo ajja. Jesosa Quito Eyacuiñajji nijje nequi tiitiani. Ohuaya miquianaya jaahuana cani quea pame nee. ⁴Jesosa Quito poe o'oyajo, eseya onijje nequi tiitije'yo quea ja'a nee nee; o jayojjaya poaje'yo onijje jjapee tiitiqianijo. Jamajjeya oe jjashahuaba tiitiqicue Jesosa Quitojo!

⁵E'e, Jesosa Quito nijje jjapeequi majje jamaya ebioneí acue ba'a: ¡Ojjaña mimishi cuana oe pajea neinei'yocue! ¡A'a pea cojjojji pojji! ¡A'a jama jjashahuabaquimeya pojji! ¡A'a quea tai jjashahuabaquijji! ¡A'a quea mimishi ba'e sa pojji! Onajaya aquiana ¡a'a quea jea bajji pea'ai! Quea dejja tai poanijo aje oe miquianaya eyacuiñajji nisho bihuiajji jayojja poani, de. ⁶Jiquio mimishi cuana jama atitii canijo, Eyacuiñajjiya shajjama' cuana quea nee nee po mee caje'yo. ⁷Jamaya aje oe miquiaaya yahuajo mimishi ahucha'a huicha'a'yonaje pea'ai onaaya acani jayojjaya. ⁸¡Jjeya ca ca pajea neinei'yocue ojjaña mimishi cuana! Jamajjeya ¡a'a quea tecue nee nee pojji! ¡A'a quea quene nee nee pojji! ¡A'a quea mase nee nee pojji! ¡A'a pea nijje mimijajji! ¡A'a quea tai mimiji! ⁹E'e, miquianajaya eba'ejji quea mimishi yahuajo jama apajea'yonajejo ¡a'a siajje pojji! ¹⁰Jjeya miquianajaya eba'ejji quea pame nee po'yonaje. Eyacuiñajjiya miquianaya ba'e meesahua cani quea boejea, o jayojja epojji, o ba neineiiji epojji. Jamajjeya ¡a'a quea mimishi po'yojji!

¹¹Jamajjeya Jesosa Quito nijje jjapeequianijo ojjaña ojaya epeeji cuana cajjapeequiahua pea nijje; pea jayojja oe capoahua. Jodio cuana ca ca Jodio

pojjeama jayojjaya ca'a'ama; dejja ecuiishasha jehuijjea'yo ca ca cuiishasha jehuijjea jjiima jayojja pea'ai, Jieno dejja pojjeama cuana, Sitinia dejja cuana pea'ai; echacojji sosema' ca ca dejja echacomeejjima' jayojja, ca'a'ama ojjaña. Jesosa Quito ca ca oe nei quea ca'a nee nee nequi tii tii. ¹²E'e, Eyacuiñajjiya miquianaya babaca ca'ya poa ma ojaya epeejjime epojji. Ohuaya miquianaya quea jea nee nee acanaje pea'ai, Eyacuiñajjiya. Jamajjeya quea pame ba'ecue jiquio jama ba'a: ¡Aema' cuana ba'e meesahuacue! ¡Pea cuana nijje jjapeequicue! ¡Mase'ama oe pocue! ¡Quea bei oe pocue! ¡Tecue'ama pea'ai oe pocue! ¹³¡Ona nijje tecue'ama pocue! E'e pojja'a pea cuaa miquianaya quea mimishi acaje. ¡Jamatii ojaya mimishi pajea'yocue; ohuaya miquea mimishi capajea ca'yahua pea'ai! E'e, Jesosa Quitohua miquianajaya mimishi cuana cuijea ca'yonaje; jamajjeya ¡miquianaaya oe pea cuanaja mimishi pajea'yocue! ¹⁴E'e jojo nei ¡pea cuana quea jea nee acue! Jamaya poanijo miquianaya ojee quea ja'a nee nee ba'eje. ¹⁵¡Miquianaya oe quea bei nee nee ba'ecue Jesosa Quitohua miquianaya quea bei nee ba'e meesahua canijo! Miquianaya ca ca oe Jesosa Quitoja epeejji poani. Jamajjeya eseya jjapeequi mee caje'yo quea cojja bei epojji. Majoya miquianaya iyaa ca'yonaje Eyacuiñajjiya. ¡Eyacuiñajji bihuiacue pea'ai!

¹⁶¡Ojjaña Jesosa Quitoja esohui cuana shajja'ajja tiitiicue! ¡Quea ja'a nee esohui esejaya epeejji cuana huasijje huohuicue; shajja'ajjacue pea'ai! ¡Ojee jjabahuejjaqui meecue quea ja'a nee pea'ai! Eyacuiñajji bihuiñaño jama pocue ba'a: ¡Sohuicuayacue quea bihui nee Jesosa Quitojo! ¡Miquianaaya Eyacuiñajji bihuiacue sohuicuayaniya pea'ai! ¡Quea quijijji bei nee pea'ai pocue Eyacuiñajji! E'e, ¡o jayojjaya jama ba'ecue! ¹⁷Esejaya Emeshi Mese nei Jesosa. Ojaya epeejji poanijo ¡ojjaña miquea esohui ojaya yajji acue! ¡Ojjaña miquea echaco ojaya epojji chacocue pea'ai! Jesosa Quitohua miquianaya jamaya ameesahua canijo, ¡Eyacuiñajji, esejaya Chii ai oe bihuiacue!

Eyacuiñajji esejaya eyamijo quea pame nequi

¹⁸Jamajjeya ehuanase cuaaya, Jesusaja epeejjiya, ¡yahue shajja'ajjacue! Jamaya miquianaya quea pame nee poaje. ¹⁹Yahueya, ¡miquea ehuanase quea jea nee acue! ¡A'a oe onijje quea tecue nee pojji!

²⁰Esho'i cuaa, Jesusaja epeejji poaniya, ¡shajja'ajja tiitiicue mique chii, miquea enaese pea'ai! Jamaya miquianaya poanijo, Jesosa Quito quea bihui nee poaje. ²¹Echii cuaa, enaeseya pea'ai, ¡a'a jamatii tecuea huicha'ajji mique bacua cuana! Oya cuana quea yeno nee poaje miquiaa tecuea tiitii'yajje.

¡Echacojji cuana, echacomeejji cuana pea'ai quea pame oe pocue!

²²Miquianaaya echacomeejjijo chacochoani ojaya yajjijo ¡miquianaja echacomeejjija esohui jama chacomeya oe acue, ojjaña tii! ¡O ba majje a'a chaco nishojji! Cho. ¡E'e jojo nei quea bihui nee oe chacocue ojaya! ¡Jamaya oe acue miquianaaya! ¡Jesosa Quito oe quea jea nee ejja'aqui! ²³Miquianaaya echacomeejjijo chacoñaño Eyacuiñajjijo chacoña pea'ai.

Jamajjeya ¡chaco neineicue Eyacuiñajjijo quea bihui nee epojji! ²⁴E'e, miquianajaya eba jama ba'a: Quijje eyajo esejaya Emeshi Mese neiya miquea echaco quea pame nee cuana sosequia caje'yo, ma ecua ohuaya huohui ca poa jayojjaya acaje'yo. E'e, miquianaya chacochoacoani Jesosa Quitojo, esejaya Emeshi Mese neijo. ²⁵¡Bacue oe! Eyacuiñajjiya ojjaña shajjama' cuana napa caje'yo quea mimishi poani sosejje. Ohuaya ojjaña mimishi ba cani. Jamajjeya joya quea mimishi nee nee poani janobajjima nei napa caje'yo; joya quea mimishi pishana poani oe pojji napa caje'yo.

4 ¹Ojjaña echacomeejji cuaa, ¡shajja'ajjacue mo oe! Miquea echacojji cuana miquea yajjijo chacochoacoani ¡sosequiacue oya huiso tiit! ¡Oya cuana oe jaahuanacue quea pame nee epojji! ¡A'a paje'yojji miquea Emeshi Mese neiya eyajo aniya miya ba tiitii cani!

Pea cuana Pabohua niñeshe'a cani

²Epeejji cuana, ¡mimi majamajacue Eyacuiñajji nijje ojjaña pojajajo! ¡Huea'ama mimicue! ¡Oya oe bihuiaacue onijje mimianijo! ³¡Eyacuiñajji nijje oe ojee mimicue ecuanajoya pea'ai! Jamajjeya ohuaya ecua huohui meesahua tiitii caje'yo esohui pame nee Jesosa Quitoja, ma onajaya yahuajo ba jjima. Ma esohui eya huohuiajoya, dejja mimishi cuaa eya iña majje jeanobiajea ca'yonaje. ⁴Jamatii miquianaya ejo Eyacuiñajji nijje mimianijo, ohuaya eya Jesosa Quitoja esohui huohui meesahua caje'yo quea ja'a nee.

⁵Jesosa Quitoja epeejji pojjeama cuana nijje mimianijo ¡jjashahuaba neineiucue quea ja'a nee! ¡Quea pame nee oe ona nijje po tiitiicue pea'ai! ⁶¡Quea bei, quea ja'a nee pea'ai mimicue Jesosa Quitoja epeejji pojjeama cuana nijje! ¡Jashahuaba neineiucue onijje mimi jjimahuajo! Jamajjeya onaya Jesosa Quito ba meesahuaje'yo.

Pabohua quea bihui nee esohui tehue canaje pea cuana huasijje

⁷Dejja Tiquico bajjani Jesusaja epeejji, e jayojjaya Jesusajo chacochoacoani, ecuanajaya quea jea nee nee. Ohuaya eya chacosahua ca'yonaje Jesosa Quitojo quea pame nee pea'ai. Ohuaya miquianaya huohui cañaquije jiquiojo e ba'yanijo. ⁸Eyaya oya huoojeaje miquiana huasijje e huohuiya. Ojaya esohui ecuanajo shajja'ajja majje ¡quea bihui nee pocue! ⁹Tiquico nijje Onesimo poquije. Oya ecua jayojjaya Jesusaja epeejji quea pame nee pea'ai. Yahuajo oya miquianajaya cuiñajjijo ba'ya poa. Ojjaña jiquiojo onaa acani huohui caje miquiana huasijje, Onesimohua. ¹⁰Anitaco enijje ejeyo'yo nequi ejjajeانباقوئى equijo. Ohuaya miquianaya huohui'ajja cani jama ba'a: —¿Achajja acuae quiana so'o? —ojaya ebajji.

Macosohua pea'ai huohui'ajja cani: —¿Achajja acuae quiana so'o, de, ecuanajaya ebajji?

Oya Macoso Benabeja jjo'yaseja bacua ejja. Miquiana que poquiyajo, ¡oya jaahuanacue quea pame nee! Jamaya eyaya miquianaya huohuinaje

yahuajo. ¹¹Jesosa Josoto yani pea'ai. Ohuaya huohui'ajja cani pea'aiya: —¿Achajja acuae nequiana so'ο, ecuanajaya ebajji?

Jiquiojo pea beca peejjima Jodio cuana Jesosaja epeeji yani. Ohuaya eya chaco meesahua cani quea pame nee Eyacuiñajjiya yajjiyo, esejaya Emeshi Mese neija yajjiyo. Pea Jodio cuanaja enijje chaco jjima, de. ¹²Epapasi cuanaya yani enijje. Ohuaya pea'ai esohui quea bihui nee huohui cani miqiana que. Yahuajo oya miqiana nijje ba'ya poa pea'ai. Jesosa Quitoja yajjiyo chaco cani ohuaya. Janobajjima nei mimi tiitiiani Eyacuiñajji nijje miqianajo jama ba'a: —Eyacuiñajji, ¡miyaya ojjaña Conosajo ba'e cuana Jesosa Quito nijje jjapeequi meesahuacue quea ja'a nee! ¡Miquea esohuiyo e'e jojo nei oya cuana jjabahuejjaqui meesahuacue! ¡Miquea esohui jama ba'e tiitii meesahuacue, Eyacuiñajji! —jamaya Epapasi mimiani Eyacuiñajji nijje miqianajo.

¹³E'e, Epapasi mimi tiitiiani Eyacuiñajji nijje miqiana jaahuanajji. Quea huesha cuiñajji yasijje Jesosaja epeeji cuana Naonisea cuiñajjiyo ba'e yasijje, Jienaponi cuiñajjiyo ba'e pea'ai yasijje Eyacuiñajji nijje mimi tiitiiani, Epapasi. Jamaya eyaya oya baña. ¹⁴Ecuanajaya epeeji quea pame nee Noca bajjani yani jiquiojo. Oya eshicuijjiqiajji, de. Dejja Demasi bajjani yani pea'ai. Ohuaya esohui quea bihui nee huoojea cani miqiana huasijje.

¹⁵¡Ecuanajaya esohui quea bihui nee huohuicue Jesosaja epeeji nei cuana huasijje Naoniseajo ba'e yasijje! ¡Epona Nema bajjani oe huohuicue! ¡Ojaya epeeji cuanaya pea'ai huohuicue, joya oja equi yasijje jjachachaquiiani Eyacuiñajjiya esohui baa! ¹⁶E'e, jiquio ecuea esohui etehue'yo ba neinei majje ¡huohuicue Jesosaja epeeji cuana huasijje Naoniseajo ba'e yasijje! Majoya ohuaya miqianaya quia caje o'oya pea esohui etehue'yo, ma eyaya ebionei tehuenaje o que. ¡Ma esohui shajja'ajjacue, ojjaña miquiaaya! ¹⁷Pea dejja Aquipo bajjani huohuicue ecuea esohui jama ba'a: —Eyacuiñajjiya miya huoojea ca'yonaje ojo chachohua. Jamajjeya ¡chacocue quea pame nee ojo! ¡Ojjaña joya ecua ohuaya huohui cani jamaya oe acue!

¹⁸Eyaya ca eya jiquio esohui quea bihui nee tehue'yonaje. Dejja cuanaja eya pichojea'yo jjima; eya ejeyo'yo tii nequi. ¡A'a eya pajea'yojji! ¡Eyacuiñajjiya miqianaya cajaanuana tiitii cahua quea pame nee!

Mahuiso. Eya Pabo bajjani esohui tehuejji. Apoa.